



উপজেলা পরিক্রমা

মোহনগঞ্জ

মোহনগঞ্জ (নেত্রকোনা), ৮ ফেব্রুয়ারী (সংবাদদাতা)।— নেত্রকোনা জেলার ২২ কিঃ মিঃ পূর্বদিকে মোহনগঞ্জ উপজেলা অবস্থিত। এর উত্তরে সুনামগঞ্জ জেলার ধর্মপাশা, পূর্বে সিলেট জেলার জামালগঞ্জ ও তাহেরপুর, দক্ষিণে খালিয়াজুরী এবং পশ্চিমে বারহাট্টা ও আটপাড়া উপজেলা। ১টি পৌর এলাকা ও ৭টি ইউনিয়ন পরিষদে মোট ১২৭টি মৌজায় ১৮৭টি গ্রাম নিয়ে মোহনগঞ্জ উপজেলা গঠিত। এর আয়তন ৯৫.৯৯ বর্গ মাইল। মোট লোকসংখ্যা ১,০৭,৯৩৪ জন।

যোগাযোগ

বিল, ঝিল, হাওড়ে পরিপূর্ণ এই মোহনগঞ্জ উপজেলায় বাস-ট্রাক চলাচলোপযোগী কোন রাস্তা নেই। নীচু এলাকায় বর্ষাকালে নৌকা-লঞ্চ যাতায়াত ও পরিবহনের মাধ্যম হিসেবে ব্যবহৃত হয়ে থাকে। তাছাড়া এখানে মোট ৫০ মাইল কাঁচা রাস্তা রয়েছে।

শিক্ষা

মোহনগঞ্জ উপজেলায় শিক্ষিতের হার ১৯.৪%। এখানে ১টি উচ্চ বালিকা বিদ্যালয়সহ মোট ৭টি বেসরকারী উচ্চ মাধ্যমিক স্কুল ও ৩টি নিম্ন মাধ্যমিক স্কুল রয়েছে। ৪৮টি সরকারী প্রাথমিক বিদ্যালয়সহ মোট ৫২টি প্রাইমারী স্কুল রয়েছে। ৭টি এবতেদায়ী মাদ্রাসা, ২টি দাখিল মাদ্রাসা ও ৪টি বিশেষ মাদ্রাসা রয়েছে। উপজেলা কেন্দ্রে ১টি ডিগ্রী কলেজ আছে। এ ছাড়া উপজেলায় মোট ১৫টি মসজিদের অনেকগুলোতেই প্রাথমিক শিক্ষার কাজ চলছে।

সুচিকিৎসা

উপজেলায় সুচিকিৎসার অভাবে জনগণ

বড়ই দুর্ভোগ পোহাচ্ছে। উপজেলা কেন্দ্রের আধুনিক হাসপাতালে এখনও চিকিৎসার কাজ শুরু হয়নি। পুরাতন সরকারী হাসপাতালে সরকারী চিকিৎসা চলছে। অস্বাস্থ্যকর স্থানের এই জীর্ণ পুরাতন হাসপাতালটিতে মাত্র ৩/৪ টি বেড রয়েছে।

কৃষি

প্রকৃতির উপরই অধিক নির্ভরশীল মোহনগঞ্জ উপজেলার মুক্তিশক্তি অধিক বলে কৃষি ফসল উৎপাদন অপেক্ষাকৃত ভাল। এখানকার উৎপাদিত ফসলের মধ্যে ধান, বাদাম, সরিষা, ডাল, পাট, আলু ও তামাকই প্রধান। উক্ত উপজেলায় পল্লী উন্নয়ন বোর্ডের আওতাধীন ৪৩টি কৃষি সমবায় সমিতি, ৬টি বিস্তৃহীন ও ৫টি মহিলা সমবায় সমিতি রয়েছে। এছাড়া ৭টি ইউনিয়নে বহুমুখী সমবায় সমিতি, ১০৯টি কৃষক সমবায় সমিতি, ৭টি মৎস্যজীবী সমিতি ও ১০টি মহিলা সমবায় সমিতি আছে।

উপজেলার মোট জমি ৫৭০২৮ একরের মধ্যে আবাদী জমির পরিমাণ ৪৫৭৫০ একর। তাছাড়া এখনও আবাদযোগ্য ২৪৬৫ একর জমি পতিত রয়েছে। অধিকাংশ জমিই এক-ফসলী। তিন-ফসলা জমি ২৮৬ একর মাত্র।

হাটবাজার

উপজেলাবাসীর আর্থিক অবস্থা অনেকটা ভাল হলেও হাটবাজারগুলো অত্যন্ত নিম্নমানের ও নানা সমস্যা জর্জরিত। এখানকার হাটবাজারগুলোর স্থানাভাব সমস্যাটি প্রকট।